

原輯南嶽志廿六卷

第九冊

南嶽志卷十四

平江李元度原輯衡山

王香余
歐陽謙

校刊

仙釋一

隋唐以前衡嶽羽流白日冲舉者不可勝數自思大師振錫南來懷讓石頭繼之宗風盛而道流稍替矣然洞天福地間異人蓋不少也舊志存攘斥佛老之見於二氏僅存崖畧事蹟頗芟蕪之不知志山非講學比也班史列神仙書十家稱其能葆性命之真蔚宗西域傳論亦闡明佛法感驗今緇黃之棲嶽者以數千計不舉其尤彼將何所效法耶彙而列之仙道得百有七人名僧百六十三人亦各傳其教而已

老君

〔道藏〕老君號赤精子顓頊辛卯元年降於衡山敎帝解紛塞兌治國安民滌蕩九黎陟明八愷有龍野紫髯之克醜蛇身赤髮之渠魁力拔不周首觸山崩天低西北致日月之西行地亞東南使江海而東注君追呼六甲役御百靈訓之以微言之經敎之以大順之道其害始息

西王母

〔漢武帝外傳〕西王母約上元夫人共造南嶽朱陵山食靈瓜其味甚甘美〔集仙傳〕元壽二年八月王母傳玉清隱書四卷以授南嶽魏夫人時太靈真人等歌太極歌王母作歌曰逍遙兮精際萬流

無暫停哀此去畱會劫盡天地傾當尋無中景不死亦不生體被
自然道寂觀合大冥南嶽挺真榦玉映擢穎清有任靡其事虛心
自受靈嘉會絳河曲相與樂未央

赤松子

太上三洞寶經裴君曰我師南嶽赤松子爲太虛真人昔太上以
德敎老子而得道赤松子以道授我而得仙道藏真迹經南嶽太
虛真人卽赤精子也一云赤松子嘗授王真人以素書二十五卷
得昇舉太虛真人有歌傳於世

歌曰控飊扇太虛八景飛高清仰浮紫宸外俯看絕蒼冥元心
空洞間上下弗畱停無奈兩際中有待無所營體無則能死體

有則攝生東賓會高唱二待奚足爭

茅盈

大台山志茅盈勾曲人曾祖濛字初成於華山乘雲駕龍白日昇天盈年十八委家學道詣南嶽上真西城王君受道命爲太元真人治大霍赤城玉洞之府時漢平帝元壽元年也雲笈七籤茅盈歸句曲邦人改句曲爲茅君之山漢平帝元壽二年天帝授盈敕爲司命東卿上真君臨去告二弟曰吾今去矣要當一年再來此山三月十八日要吾師尊及南嶽太虛赤真人遊盼於二弟之處也

惠車子

南嶽紀畧惠車子與嚴君平友善遊湘棲嶽尸解赤帝峯

王妙想

集仙錄王妙想蒼梧女道士辟穀服氣居南嶽黃庭觀旁朝謁精誠想念丹府由是感通每至月旦常有光景雲物之異如是歲餘忽有音樂遙在半空稍久散去又歲餘忽有靈香郁烈祥雲滿庭天樂之音震動林壑光燭壇殿如十月並明空中作金碧之色不可仰視須臾千乘萬騎懸空而下皆乘麒麟鳳凰龍鶴天馬人物儀衛數千人皆長丈餘持戈戟兵仗旌旛幢蓋良久乃鶴蓋鳳車導九龍之輦下降壇前有一人羽衣寶冠佩劍鞞履陞殿而坐身有五色光赫然羣仙擁從亦數百人妙想伏謁大仙謂妙想曰吾

乃帝舜也地司奏爾住此三十餘年始終如一守道不邪存念眞神遵稟元戒吾以歷數旣往歸理此山常以久視無爲之道分命仙官下教於人世人求道若存若亡百萬中無一人勤久者多是初勤終惰前功併棄耳汝宣布我意廣令開曉也乃命侍臣以道德二經及駐景靈丸授之而去如是一年或三五年降於黃庭觀十年後妙想白日昇天

劉根

一統志劉根先生未詳何許人雲遊四方晚歸南嶽之東峯煉眞服氣後仙去

雙子辨

嶽志雙子辨號華蓋居士在靈芝峯修煉

王谷神

總勝集王谷神蜀青城山道士渡荆渚泛瀟湘至南嶽居金母殿
胎息還元數年道成漢武帝封爲太微先生

皮元曜

總勝集皮元曜與王谷神同居南嶽金母殿道成武帝封爲太素
先生

李鳳仙

通志李鳳仙南嶽女仙自幼不語人固問之乃答云知白守黑道
貴昏嘿

賣薑翁

文獻通考賣薑翁未詳何許人日在嶽市賣薑閱三十餘年顏色不改有道士遇之欲授以黃白之術翁不答但取擔上薑納口中須臾吐出成黃金兩人相顧而笑自是不復見

張道陵

嶽志天師張道陵嘗自天目山遊南嶽謁青玉光天二壇禮祝融君祠

張正禮

真誥張正禮漢末入衡山服黃精顏色澤悅嘗受西城君虹景神丹患丹砂難得至廣州爲道士遂得內外洞徹兼修守一之法仙

去同時治明期與正禮同在衡山受服王君虹景丹積三十餘年
不知所終

鐵腳道人

鐵腳道人姓杜氏名巽才魏人嘗朗誦莊子秋水篇取梅花和雪
嚼之曰欲令肺腑皆香也及登祝融峰觀日出嘆曰雲海盪吾心
胸矣

〔按〕鐵腳道人舊志莫詳其姓字考四庫全書道家類存目有霞
外雜俎一卷係鐵腳道人撰所言皆養生術大抵闡黃老清靜
之理有敖英序稱嘉靖丁酉泊舟空舫灘遇仙翁所授又有後
跋知其爲魏人杜巽才云

新野先生

通志新野先生晉太康中與徐君採藥入衡山

施存

湖廣通志施存號湖浮先生居南嶽西峰洞門觀之石室常跨白豹而出晉永康元年四月七日昇舉真誥衡嶽洞門觀在石廩峰下昔施真人師黃盧子得三皇內文役御豹虎之術遁變化景之法或隱或顯數百年慕石廩洞門是其沖真之地乃居之又於峰西石鑄造閣亘空十餘丈出乘白豹或步還山豹卽迎之以晉惠帝永康元年乘豹昇天

魏夫人

嶽志魏夫人任城人司徒魏舒女名華存字賢安幼好道術慕神仙年二十四適南陽劉文生二子長曰樸次曰遐劉文後爲修武令夫人齋於別寢一日遇羣仙授太上寶文及黃庭內景經遂得神真之道嗣值世亂夫人攜二子渡江樸爲庾亮司馬安成太守遐爲陶侃從事中郎夫人登衡山棲紫虛閣望前峰有妖氣祛之仰天臺白雲潭其遺跡也自是冥心齋靜真靈屢感年八十三以晉成帝咸和九年託劍化形白日飛昇位爲南嶽夫人唐顏真卿立碑紀其事南嶽魏夫人內傳夫人姓魏諱華存字賢安任城人晉司徒文康公魏舒女也少讀老莊春秋三傳五經百子常別居一園獨立閑處服餌胡蘆父母偏之強適太保公掾南陽劉幼彥

疇昔之志存而不虧後幼彥爲修武令隨之縣舍閑齋別寢入室
百日所期仙靈季冬月夜半四真人來降于室太極真人安度明
東華青童君碧海景林真人清虛真人王子登於是夫人拜乞長
生度世青童君曰此清虛真人者爾之師也當受業焉景林真人
曰爾應爲紫虛元君上眞司命封南嶽夫人也夫人謝曰此是婢
子有幸賜以性命自陳畢東華小童指而笑曰用心苦哉於是清
虛真人王君乃命侍女華散條季明盃等披雲蘊開玉笈出太上
寶文八經隱書大洞眞經靈書八道紫度炎光石精玉馬神眞虎
文高仙羽元三十一卷卽手授夫人也王君昔學道在陽洛山遇
南極夫人西城王君受此三十一卷經行之成眞人今所授者是

南極西城之本經也陽洛山有洞臺是清虛之別宮也王君當授
魏夫人經之時起立北向而誓曰太上三元九皇高真太帝使教
于魏華存於是景林真人又授夫人黃庭內景經一名太上琴心
一名大帝金書一名東華玉篇令晝夜誦之王君又告曰子若不
在山中隱身齋戒則太洞真經不可妄讀也至于虎經龍書八索
隱文之屬奇祕元奧若不齋戒絕世不可施行子今且可誦黃庭
內經步躡七元存五星之神而已人間行之亦足感通變化欲成
際會我有以相迎矣方諸青童怡然小畱四真吟唱乃命北寒玉
女宋聯涓彈九氣之璈東華玉女燕景珠擊西盈之鐘雲林玉女
賈屈庭吹鳳戾之簫飛元玉女鮮于靈金拊九合之節王君乃語

夫人曰諸訣要訖乃別去夫人守靜日進在世八十三年以晉成
帝咸和九年王君與東華青童來降時歲在甲午二真人與夫人
藥名曰隱遷白翳仙神散石精金光化形靈丸使稱疾忽行尅期
有定俱會陽洛宮言畢二真人去夫人卽服藥因稱腳疾閉目寢
息飲而不食到七日其夜半之後太一元仙遣鸞車來迎駕氣騁
御徑入帷寢其時子弟侍疾眾親滿側莫之覺也夫人遂用藏景
之法託形劍化徐登鸞輪徑之陽洛居隱元之臺志棲上元誠感
九天丹心氣澄神太素夫人遂北詣上清宮太微天帝遣九宮
太真侍玉元晨郎李明期授夫人神鳳之章使封山召雲中央黃
老君遣正一羽晨侯公陽子明授夫人龍衣虎帶丹青飛裙十絕

華幡使川登行上清攝眞命仙三素高元君遣左華九成夫人范
定英授夫人流金火鈴九蓋之輶使彈制萬魔飛輪太無太上玉
晨大道君遣繡衣使者孟六奇授九色之節雙珠月明神虎之符
錦旂虎旌使位主羣神以威六天太素三元君遣使禁仙都衷文
堅右嬪元姬趙約羅授夫人西華玉女三百八景飛輿元景九龍
使侍衛執巾上詣三清扶桑大帝君遣八元仙伯柯原首五方天
帝君簡肅正等授夫人玉札金文位爲紫虛元君領上眞司命使
主諸學道死生圖籍攝御之官關校罪考金闕後聖君命仙伯牙
叔平授夫人青瓊之板丹綠爲文位爲南嶽夫人比秩仙公給曲
晨飛蓋以遊九宮使治天台大霍山洞臺之中主下訓奉道教授

當爲眞仙者令一月再登玉清三登太素四謁玉晨宮宴扶桑之高臺於是夫人受王母之命且還王屋山小有之中更齋戒三月九微元君龜山王母西城眞人王方平太虛眞人赤松子桐柏眞人王子喬並降小有清虛上宮絳房之中各命侍女金石發響於是西母徘徊起立折腰俯唱曰哀此去畱會劫盡天地傾嘉會降阿內相與樂未央歌畢須臾司命神仙諸隸屬及南嶽神靈迎官並至西母等與夫人同去詣天臺霍山臺集仙錄大茅君盈南治句曲之山元壽二年八月己酉南嶽眞人從王母降於茅盈之室又王母與金闕聖君降於臺中同詣清虛上宮傳玉清隱書四卷以授魏夫人時太虛眞人等歌太極歌王母亦作歌而去眞誥夫